

Penularan coronavirus

Pesawat berlepas ke Wuhan bawa pulang rakyat Malaysia

141 penumpang akan melalui tapisan kesihatan sebelum dibenar berlepas balik

Oleh Rafidah Mat Ruzidi dan Luqman Arif Abdul Karim
bhnews@bh.com.my

Kuala Lumpur: Pesawat AirAsia, AK8264, berlepas dari Lapangan Terbang Antarabangsa Kuala Lumpur 2 (klia2) ke Wuhan, China, pada jam 4.38 petang semalam, untuk membawa pulang 116 rakyat Malaysia dan 25 pasangan dan anak mereka, yang berdepan perintah berkurang di bandar raya dalam wilayah Hubei itu.

Timbalan Perdana Menteri, Datuk Seri Dr Wan Azizah Wan Ismail, berkata pesawat A320 itu turut membawa bersama 500,000 sarung tangan getah sebagai sumbangan kepada kerajaan China dalam operasi menangani penularan coronavirus (2019-nCoV) di negara terbabit.

"Kesemua 141 penumpang ini akan melalui tapisan kesihatan mengikut ketetapan pihak penerbangan di Lapangan Terbang Antarabangsa Tianhe, Wuhan, sebelum dibenarkan memasuki pesawat untuk berlepas balik ke Malaysia.

"Tempoh yang diambil untuk tapisan kesihatan, proses imigresen dan kebenaran berlepas tidak dapat dipastikan buat masa ini.

"Sebaik tiba di Malaysia, se-



Sebahagian daripada pasukan Perubatan Kecemasan dan Perkhidmatan Trauma (EMTS) Kementerian Kesihatan membawa peralatan untuk berangkat ke Wuhan semalam. (Foto Aizuddin Saad/BH)

mua 167 penumpang iaitu 141 yang dibawa pulang, 12 kru, lapan petugas misi dan enam pegawai Kedutaan Besar Malaysia di Beijing sekali lagi akan melalui tapisan kesihatan di Unit Bencana Udara (ADU) KLIA," katanya dalam kenyataan, semalam.

Dr Wan Azizah yang juga Pengerusi Jawatankuasa Pengurusan Bencana Pusat, berkata manamana penumpang didapati mempunyai gejala coronavirus akan dibawa terus ke hospital, manakala yang melepasi saringan dibawa menaiki bas ke pusat pemantauan selama 14 hari.

"Agensi Pengurusan Bencana

Negara (NADMA) akan berhubung dengan waris mereka bagi memaklumkan urusan penerbangan pulang dan memberi penerangan berkaitan proses kuarantin yang perlu dilalui ahli keluarga sepanjang 14 hari," katanya.

Sementara itu, Menteri Kesihatan, Datuk Seri Dr Dzulkefly Ahmad, menjelaskan yang sepanjang tempoh kuarantin itu, ahli keluarga mereka tidak boleh datang melawat, sebaliknya hanya boleh berhubung menerusi telefon bimbit.

Menyentuh empat fasa proses membawa semua rakyat Mala-

ysia pulang, beliau berkata, saringan terhadap kesemua rakyat Malaysia dan warga asing yang juga pasangan serta anak mereka, akan dilakukan pihak berkuasa China di Lapangan Terbang Antarabangsa Wuhan Tianhe, sebelum dibenarkan menaiki pesawat AirAsia yang melakukan penerbangan misi bantuan kemanusiaan itu.

Katanya, hanya mereka yang didapati sihat yang dibenarkan menaiki pesawat untuk pulang, manakala mereka yang menunjukkan gejala perlu tinggal di Wuhan untuk menjalani rawatan.

Risiko jangkitan virus dalam penerbangan sangat rendah

Kuala Lumpur: Sistem pengudaraan yang baik dalam pesawat, menyebabkan risiko jangkitan coronavirus (2019-nCoV) di antara penumpang yang berada dalam penerbangan sama adalah sangat rendah.

Berdasarkan maklumat daripada syarikat pengeluar pesawat, Malaysia Airlines Berhad (MAB) menjelaskan, udara dalam kabin diagihkan semula selepas disaring melalui udara tapisan partikel keberkesanan tinggi (HEPA).

"Ini bermaksud, kebarangkalian untuk anda terdedah kepada bakteria dan virus menerusi kitaran udara (dalam pesawat) adalah sangat rendah.

"Malah oleh kerana sistem pengudaraan yang baik dan sangat berkesan, udara dalam kabin pesawat ialah lebih bersih berbanding bangunan pejabat dan setaraf kualiti di kebanyakan hospital.

"Bagaimanapun, marilah kita terapkan amalan menjaga kebersihan diri dan kerap membasuh tangan, selain mematuhi etika ketika bersin atau batuk di khalayak umum," katanya dalam satu kenyataan di sini.

Coronavirus yang dikesan mula terdetek dan menular dalam kalangan manusia dari pasar makanan laut di Wuhan, wilayah Hubei, China, sejak Disember lalu kini mengorbankan 362 nyawa dan menjangkiti seramai 17,387 orang di seluruh dunia.

Virus baharu yang mengundang risiko tinggi dalam kalangan orang tua, kanak-kanak dan mempunyai masalah kesihatan itu setakat ini sudah merebak ke 27 negara di seluruh dunia, termasuk Malaysia, Thailand, Indonesia dan Singapura.

Protokol darurat mungkin lewatkan perlepasan

Kuala Lumpur: Pesawat khas yang dijadualkan membawa rakyat Malaysia keluar dari Wuhan, China, mungkin berdepan kelewatan berikutan situasi rumit membabitkan protokol darurat, imigresen dan proses saringan kesihatan.

Memperincikan perkembangan semasa, Duta Malaysia ke China, Raja Datuk Nushirwan Zainal Abidin, berkata keadaan itu adalah perkara biasa ketika misi sedemikian, namun pihaknya sentiasa berhubung dengan rakyat Malaysia yang berada di Wuhan dan sekitar wilayah Hubei yang terjejas.

Katanya, prosedur berkaitan turut dimaklumkan kepada rakyat Malaysia supaya misi berupaya dijalankan tanpa sebarang rintangan, selain senarai penumpang yang bakal dibawa pulang ke tanah sudah dikemukakan kepada pihak berkuasa China.

Wabak coronavirus dikesan menular dalam kalangan penduduk Wuhan berpunca daripada operasi pasar makanan laut di bandar raya itu sejak Disember lalu yang kini mengorbankan 362 nyawa dan menjangkiti seramai 17,387 orang di seluruh dunia.

Virus baharu yang mengundang risiko tinggi dalam kalangan orang tua, kanak-kanak dan mempunyai masalah kesihatan itu setakat ini sudah merebak ke 27 negara di seluruh dunia, termasuk Malaysia, Thailand, Indonesia dan Singapura.

Nushirwan berkata, pasukan petugas dari Kedutaan Besar Malaysia di Beijing yang tiba di bandar raya sudah membuka bilik operasi sekretariat sejurus tiba bagi membantu proses penghantaran pulang rakyat Malaysia.

Beliau berkata, tugas pasukan itu mencakupi urusan menghubungi pihak berkuasa berkaitan di China bagi melancarkan proses membawa pulang rakyat Malaysia ke tanah air, selain mendapatkan 'lampu hijau' kastam bagi tujuan penyaluran bantuan kemanusiaan.

"Semua urusan berjalan lancar kerana mendapat kerjasama baik daripada pihak berkuasa China. Ini adalah hasil perbualan telefon

di antara Menteri Luar, Datuk Saifuddin Abdullah dan rakan sejawatnya merangkap Kaunselor Negara China, He Wang Yi, pada Sabtu lalu," katanya.

Bagi memastikan harapan rakyat Malaysia yang berdepan perintah berkurang di Wuhan susulan penularan wabak coronavirus tetap utuh, Kedutaan Malaysia di China turut menitipkan pesanan khas menerusi saluran berkaitan.

"Hari ini adalah hari untuk membawa pulang rakyat Malaysia di Wuhan. Kerajaan Malaysia dan kedutaan mengambil segala usaha dan tindakan yang diperlukan supaya urusan berjalan dengan lancar.

"Rakan kedutaan kami di Wuhan akan sentiasa memaklumkan perkembangan terkini dan juga tindakan yang perlu diambil. Usaha ini adalah rumit dan kemungkinan berdepan dengan faktor kelewatan daripada jadual asal, namun yang pastinya anda akan berada di dalam penerbangan berkenaan," katanya.

"Sentiasa bertenang, sabar dan pastikan anda boleh sentiasa dihubungi, selain menjaga keselamatan serta kebersihan diri. Sekiranya ia dipatuhi, semuanya akan berjalan dengan baik.

"Inilah saat dan masanya untuk kita buktikan kepada diri kita serta dunia yang jati diri anak Malaysia bersemangat kental dan bersatu hati!" katanya.

